



# DEO OPTIMO MAXIMO UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

## QUÆSTIO MEDICO-CHIRURGICA, QUOD LIBETARIIS DISPUTATIONIBUS

*manè discutienda in Scholis Medicorum, die Jovis quiniâ  
mensis Martii, anno Domini M. DCC. LXXII.*

M. CAROLO-FRANCISCO THEROULDE  
DE VALLUN, Equite, Doctore Medico, Præsidente.

*An contusioni cuicumque simplici interior simul & exterior vulnerariorum usus?*

I.



ROH lugenda fors hominum! innumeris hostibus & plerumque flecti nesciis obvii, haud rarò in iis debellandis à recto tutoque tramite deviant. Nunc ferrum vel ignis opponitur morbo quem sola opportuno tempore sanaverint medicamenta, nunc solis naturæ viribus committitur quod remediis eget efficacissimis. Pleuritides nonnullas, multas contusiones, quia initio neglectæ fuere, in supurationem abire notum est. Quot membra naturalis quidam impulsus chirurgicæ falci subripuit? Morborum equidem judicium difficile, & difficilior adhuc, nisi citò tutoque principiis obliteris, prudenti consilio navem dirigens. Si malum leve extollere non debeat chirurgus, sic & magnum non parvi faciat. Con-

tusio quancumque corporis afficiat partem; medelam semper exposcit, citrà quam periculosa, nonnunquam etiam lethalis fieri potest. Ab omni artifice rem alienam asserit divus Senex esse dilationem, imprimis in medicina ubi dilatio vitæ periculum parit. Contusis itaque citò citius opem ferendo, quid periclitaris? Si autem differ, in aliud tempus, & quidquid oporteat antequam radices agat morbus, non peragis, nonne agrotantem plerumque in suppurationis aut gangrænæ aleam adducis?

## I I.

**C**ONTUSIO est cuiusdam partis corporis læsio, communium absque tegumentorum divisione, ab instrumento qualicumque duro & obtuso facta. Collisi vulneris ea nomen obtinet, cum in parte contusa notabilis sit & exterior continui solutio, cutis scilicet & cuticulæ. Contusioni accidit cuilibet ut innumera venulæ, arteriolæ & fibrillæ distraherentur atque dilacerentur. Ex disruptis exiliunt vasis contenti liquores, & ruunt in loca aliena vicinaque. Hæc liquidorum extra vasa minora sub integumentis effusio ecchymosim seu sugillationem constituit, quæ semper maculâ subfolitariâ, planâ aut parum prominenti, colore nigricanti vel atro-rubro aut livescenti distinguitur. Corporis itaque contundentis tanquam necessariis effectus haberi debet sugillatio, quam ideò vocant *ecchymoma* ab iſtu nonnulli practici ita ut adeste contusio nequeat quin adſit pariter ecchymoma, sed ecchymoma potest absque contusione supervenire, ut in typho, variolâ, peste, & sæpius in affectione scorbuticâ. Unicum igitur esse contusionis symptoma pathognomonicum iudicamus ecchymosim, modò tamen antea iſtu, impulsu, jactu percutiatur corpus, vel instrumentis quibuscumque retusis, sustibus puta, tignis, lapidibus, globis ex machinis ignivomis, januis, prelis, cochleis, rotis molaribus, curribus... confringatur aut comprimatur. Contundens corpus vel partes tantum afficit, vel osseas simul; si prius, simplex dicitur contusio, composita autem si posterius. De priori duntaxat specie hic agitur.

## I I I.

**S**IMPLICES inter contusiones aliæ aliis periculosiores evadunt. Periculû verò gradum apprimè emetiri arduum opus. Qualis reipsâ est contusio haud semper talis apparet. Illa symptomatis licet gravioribus stipata, ut cephalalgia, membrorum languore, anorexiâ, nauseis, pœnè absque remediis evertitur. Hæc contrà, ubi vix livido vel nigricanti colore donatur cutis exterior, brevi perniciem contusi clanculum orditur, nisi ignem suppositum cineri doloſo ars medica extemplò suffocet. Quædam tamen extant levioris momenti contusiones. Quot enim exempla puerorum in fronte ex lapsu contusorum, qui solâ nummi argenti compressione vel unâ tantum venæ-sectione institutâ, tumore sugillationeque inde subortis feliciter expediti fuere? Si autem faustos inter tot eventus aliquot huiusce simplicissimæ methodi inveniantur victimæ (uti infra patebit) huic nimium ne credere oportet. Exquisitori tutiorique contusos omnes subjicere praxi satius est, quàm concretus cruor resolvatur sensim & dissipetur, plumbeus & niger color dilutior evadat, tandem revertatur in rubedinem. Sic laudabilis perficitur resolutio, quam tentare ad salutem multati obtinendam necesse est, ne accedat suppuratio aut reformidanda magis gangræna. Totum præterea corpus cavis plenum esse nequaquam reticendum est. Alia majora ut ventriculi, cerebri, thoracis cayum, abdomen, ... alia minora ut cellulæ quæ membranis omæ

3

nibus subjacent. Liquida porro effusa si non statim digerantur nec vasis bibulis re-  
forbeantur, tunc naturales illas replere possunt cavitates, & ideo generis varii  
tumores efficere, anevryfma spurium puta, vomicam, meliceridem, atheroma,  
fleaoma.

## I V.

**N**IHIL in confusione curandâ efficacius censetur quam herbarum traumati-  
carum interna simul & externa administratio. De virtute resolutivâ quâ pol-  
lent omnes, quis dubitabit, si earum principia chemica consideret & experien-  
tiam consulat? Vulgò usurpantur quæ è montibus Helvetiis, Genevensibus &  
Arvernīs nobis asseruntur, & in officinis venales prostant. Legitima est illarum  
electio si à sagacibus phytologis agnoscantur veronica offic. fanicula offic. ajuga  
reptans, hypericum perforatum, vinca major, glechoma hederacea, centaurea  
benedicta, teucrium scordium, agrimonia eupatoria, betonica offic. achillea mil-  
lesfolium, asplenium scolopendrium, gnaphalium dioicum, & tusilago farsara.  
Aliquoties inter hæc 14 plantas aliæ annotantur ut hieracium pilosella, adiantum  
capillus veneris, pyrola rotundi-folia. . . sed incolarum fraude vel incuriâ. An-  
tequam ægrotanti dentur hæc vulneraria, per infusionem calidam instar thepari  
debent. In aquâ bullientis libris tribus per horæ circiter quadrantem infundan-  
tur ad manipulum semis, dein splenia hujusce-liquoris calidi parte unâ imbuta  
contusioni applicet æger, partem verò alteram in eodem fere instanti ciathim  
ebibat sacchari paululum addendo, tandem ad aliquot dies remediū usum protra-  
hat. Aliud medicamen quoque præstantissimum contusis, sed longè simplicius offe-  
runt nigre sambuci flores cum juniperi communis baccis infusi. Ubi vis fere lu-  
xuriat utrumque, illorum infusio ut præcedens conficitur ac præscribitur. Quâ  
autem doh? parvi refert, dummodò statim post contusionem impendatur. En-  
citam, tutam, jucundamque methodum omnibus simpliciter contusis absolute ne-  
cessariam; semper optatum conferet emolumentum, & si semel incassum adhi-  
beatur, nihil mali fecisse tibi persuasum maneat.

## V.

**S**UCCURRERE contusis qui omittit, ille procul dubiò variis eos peri-  
culis objicit. Plurima enim occurrunt apud Bohnium & Techmeyerum exem-  
pla quæ docent validam contusionem, quamquam minima læsio exterius appare-  
ret, sæpè sæpius hepar, lienem, aut aliud corporis viscus confregisse, unde  
improvisa mors. Quin imo compertum est validas contusiones, nullo equidem  
tum in externis tum in internis partibus extante damni indicio, tamen necem  
induxisse. Carnes contusas putrescere, & in pus versas tabescere notat ipsemet  
Hippocrates. Ex decem casibus juxta D. Wanswieten scirrhus mammarum & can-  
cer novies fortè à contusionibus oritur. Mulierem vidit illustrissimus ille vir cui in  
eodem lecto dormiens filia cubito mammam contuderat; paucarum septimanarum  
spatio habuit totam mammam scirrhosam & mole immaniter auctam, quæ pos-  
tea in horrendum cancerum degeneravit. Dolarius dum cados agitare in dextrum  
thoracis latus decidit: doloris expertis suis negotiis ut antea operam dedit; die-  
bus autem aliquot elapsis dolor gravativus, dyphnœa, lentaque febris miserum  
invasit. Huic indicata præscripsit remedia D. Tissot, sed rectius se valere ratus  
æger ea despexit & in eâdem hebdomade noctu protinus obiit. Adolescens feroci  
vexus equo prope januam equilis contractus est. Duodecim elabuntur dies, nec

4

quidquam dolet, postea symptomaticus cruciatus eisdem ac si febre putridâ corripetur, tanquam hoc morbo laborans per unum circiter mensem tractatur. Cum irrita evadunt omnia, accersiti Medici pus in pectore adesse pronuntiant; tunc paracentesis instituitur quæ feliciter in ægrotantis salutem cedit (TISSOT, *avis au peuple*). Aureliæ anno 1767 die 26 Oct. frontem impexit parieti mulier 30 annos nata. Unâ tantum venæ-sectione institutâ laboribus solitis veluti fana incubuit, usque ad 14 mensis sequentis diem quo typhomaniâ repenteprehenditur. Hujusce morbi causâ moniti tartarum sibiatum illic præscripsimus, dein supra tonsam capitis verticem irrigationes glaciales ab alto, temporis successu super eandem partem emplastrum vesicatorium, quo factô, per omnia fere colatoria quinque dierum spatio effluerunt humores tum purulenti tum sanguinei, & hac crisi convaluit perfectè ægra. Quibus constat nihil esse tam exitiosum quam medicationem contusorum remorari; & prius allata si perpendantur, quanti contra sit emolumenti eos curare statim post contusionem, certius patebit. Sed in eo ponitur illa medendi ratio ut intus simul & extus administrentur herbæ traumaticæ,

*Ergo contusioni cuicumque simplici interior simul & exterior vulnerariorum usus.*

### DOMINI DOCTORES DISPUTATURI.

*M. Joannes - Jacobus  
NOLLAN.*

*M. Claudius LAFISSE.*

*M. Carolus DIONIS, Chi-  
rurgiæ Gallico idiomate,  
Professor designatus.*

*M. Bartholomæus - Petrus  
DELANOUE, Eques,  
in Supremo Senatu Patro-  
nus.*

*M. Josephus - Ignatius  
GUILLOTIN.*

*M. Gedeon DE RABOURS.*

*M. Benjaminus - Michael  
SOLIER DE LA ROMIL-  
LAIS,*

*M. Carolus-Jacobus-Ludo-  
vicus COQUEREAU.*

*M. Guido-Andreas GAR-  
NIER, in Insulis Gua-  
dalupia & aliis adjacen-  
tibus Consiliarius Regis  
Medicus primarius, nec-  
non in iisdem Pharmaco-  
pæorum & Nosocomiorum  
Inspector.*

Proponebat Parisiis TUSSANUS GUINDANT, ex Virzione apud Bituricenses, Doctor Medicus Monspelienfis, Nosocomii Aureliæ Antiquus Medicus, Collegii Medicorum, Regiæque Societatis Rei Agrariæ ejusdem civitatis Socius, necnon Saluberrimæ Facultatis Medicinæ Parisiensis Baccalaureus.

A. R. S. H. 1772. A SEXTA AD MERIDIEM.

---

Typis QUILLAU, Saluberrimæ Facultatis Medicinæ Typographi. 1772.